

---

Votaziun dal pievel

# 28 da settember 2025

---

Emprim project

**Conclus federal davart las taglias  
immobiliarias chantunalas sin  
abitaziuns secundaras**

---

Segund project

**Lescha e-ID**

---



Schweizerische Eidgenossenschaft  
Confédération suisse  
Confederazione Svizzera  
Confederaziun svizra

---

---

---

Explicaziuns dal Cussegl federal  
Edì da la Chanzlia federala  
Fin da redacziun: 20 da zercladur 2025

**Emprim project**

**Conclus federal davart las taglias immobigliaras chantunala  
sin abitaziuns secundaras**

Curtamain	→	4–5
En detagl	→	8
Arguments	→	16
Text da votaziun	→	20

**Segund project**

**Lescha federala davart la cumprova electronica da l'identitat  
ed auters medis da cumprova electronics (Lescha e-ID)**

Curtamain	→	6–7
En detagl	→	22
Arguments	→	28
Text da votaziun	→	32



Ils videos  
da votaziun:

[admin.ch/videos-rm](https://admin.ch/videos-rm)



L'app davart  
las votaziuns:

VOTEINFO

## Curtamain

# Conclus federal davart las taglias immobiliarias chantunalas sin abitaziuns secundaras

### Situaziun da partenza

Tgi che posseda ina immobiglia e fa diever sez da tala, sto pajar ina taglia sin las entradas per l'uschenumnada valur da l'atgna locaziun. Da l'autra vart pon ils tschains da debits ed ils custs da mantegniment vegnir deducids da las entradas. Il parlament ha approvà ina midada da lescha, che abolescha l'imposizion da taglia sin la valur da l'atgna locaziun e che restrenscha las pussaivladads da deducziun. Quai vala per emprimas e per segundas abitaziuns. Il medem mument ha il parlament concludì ina midada constituzionala, che permetta als chantuns d'introducir ina taglia immobiliara speziala sin abitaziuns secundaras che servan per gronda part a l'agen diever.

### La refurma

Perquai che midadas constituzionalas ston vegnir acceptadas dal pievel e dals chantuns, datti ina votaziun davart questa taglia immobiliara speziala. Cunquai che l'aboliziun da l'imposizion da taglia sin la valur da l'atgna locaziun è colliada giuridicament cun la midada constituzionala, decida la votaziun davart l'entira refurma: Sche la taglia immobiliara speziala vegn refusada, resta l'imposizion da taglia sin la valur da l'atgna locaziun en vigur. La refurma influenescha la chargia fiscala da las proprietarias e dals proprietaris d'abitaziuns e pia er las entradas da la Confederaziun, dals chantuns e da las vischnancas. Sch'i resulan damain u dapli entradas, dependa fermamain da l'autezza dal nivel dals tschains ipotecars. En connex cun las abitaziuns secundaras dependi er da la dumonda, sche e co ch'ils chantuns realiseschan la taglia immobiliara speziala. En spezial ils chantuns turistics pudessan avair il basegn da compensar eventualas perditas d'entradas tar las abitaziuns secundaras.

Detagls	→	8
Arguments	→	16
Text da votaziun	→	20

Dumonda  
da votaziun

**Vulais Vus acceptar il Conclus federal  
dals 20 da decembre 2024 davart  
las taglias immobiliarias chantunalas  
sin abitaziuns secundaras?**

Recumandaziun  
dal Cussegl federal  
e dal parlament

## Gea

L'aboliziun da l'imposizion da taglia sin la valur da l'atgna locaziun simplifgescha il sistem fiscal e reducescha la motivaziun da far debits privats. La taglia immobiliara speziala possibilitescha als chantuns pertutgads da segirar lur entradas fiscales sin abitaziuns secundaras.

 [admin.ch/taglias-immobiliarias](http://admin.ch/taglias-immobiliarias)

Punct da vista  
da la minoritat  
dal parlament

## Na


Ina minoritat dal parlament refusa la refurma. Ina part da questa minoritat vul mantegnair l'imposizion da taglia sin la valur da l'atgna locaziun, perquai che l'aboliziun va en em-prima lingia a favur da las possessuras e dals possessurs d'ina atgna chasa u abitaziun e po chaschunar perditas d'entradas tar il stadi. In'autra part vul mantegnair almain l'imposizion da taglia sin abitaziuns secundaras.

 [parlament.ch > RM > Chavazzins, fatschentas, ... > 22.454](http://parlament.ch/RM/Chavazzins,fatschentas,.../22.454)

Votaziun en il  
Cussegl naziunal



Votaziun en  
il Cussegl  
dals chantuns



## Curtamain

# Lescha federala davart la cumprova electronica da l'identitad ed auters meds da cumprova electronics (Lescha e-ID)

### Situaziun da partenza

Tgi che vul empustar u dumandar insatge en l'internet, sto eventualmain s'identifitgar. Cun la cumprova electronica da l'identitad, l'uschenumnada e-ID, vegn quai ad esser pussaivel en moda cumplettamain digitalisada. La e-ID funcziunescha sco ina carta d'identitad digitala. En Svizra na datti actualmain nagina e-ID. L'onn 2021 han las votantas ed ils votants refusà l'introducziun d'ina e-ID, en spezial perquai che interpresas privatas avessan emess tala.

### Il project

La nova lescha stgaffescha la baza per ina e-ID statala. Cun questa e-ID pon las utilisadras ed ils utilisaders s'identifitgar envers autoritads ed interpresas. Qua tras èsi per exemplu pussaivel d'empustar il permiss da manischar electronic u da cumprovar la vegliadetgna per comprar in product ch'è permess pir a partir d'ina tscherta vegliadetgna. L'utilisaziun da la e-ID è facultativa e gratuita. La nova lescha prevesa, che la Confederaziun emetta la e-ID e gestiunescha l'infrastructura tecnica necessaria. La protecziun da la sfera privata e la segretezza da las datas duain tras quai vegnir garantidas optimalmain. Er autres autoritads ed interpresas pon trair a niz l'infrastructura statala e porscher agens meds da cumprova electronics, per exemplu la conferma da domicil u in attest da commembranza. Cunter la Lescha e-ID èsi vegnì fatg in referendum. Pervia da quai datti ina votaziun.

Detagls	→	22
Arguments	→	28
Text da votaziun	→	32

Dumonda  
da votaziun

**Vulais Vus acceptar la Lescha federala  
dals 20 da decembre 2024 davart  
la cumprova electronica da l'identitad  
ed auters medes da cumprova electronics  
(Lescha e-ID, LFEID)?**

Recumandaziun  
dal Cussegl federal  
e dal parlament

## Gea

Il Cussegl federal ed il parlament vulan, che persunas possian s'identifitgar en moda facila e segira sin via electronica. La nova lescha stgaffescha la baza per ina cumprova electronica statala da l'identitad. La e-ID è impurtanta, per che la Svizra possia tegnair pass cun la digitalisaziun.

 [admin.ch/lescha-e-id](http://admin.ch/lescha-e-id)

Recumandaziun  
dals comités  
da referendum

## Na

Ils comités da referendum crititgeschan, che la e-ID na saja betg segira e protegia mo insuffizientamain la sfera privata. I resultian grondas quantitads da datas sensiblas ed i possia dar abus e surveglianza. Ils comités teman er, che l'utilisaziun da la e-ID na restia betg facultativa.

 [e-id-gesetz-nein.ch](http://e-id-gesetz-nein.ch)  
 [massvoll.swiss/e-id](http://massvoll.swiss/e-id)  
 [piratenpartei.ch/eid](http://piratenpartei.ch/eid)

Votaziun en il  
Cussegl naziunal



Votaziun en  
il Cussegl  
dals chantuns



## En detagi

# Conclus federal davart las taglias immobiliarias chantunalas sin abitaziuns secundaras

### Dus projects – ina refurma

Votà vegni davart ina midada constituziunala – la votaziun decida dentant er davart ina midada da lescha: Il Conclus federal davart las taglias immobiliarias chantunalas sin abitaziuns secundaras è collia giuridicamain cun la Lescha federala davart la midada dal sistem d'imposiziun da taglia sin la proprietad d'abitar. Perquai pon ils dus projects entrar en vigur mo cuminaivlamax. Mo sch'il pievel ed ils chantuns acceptan la taglia immobiliara speziala sin abitaziuns secundaras, vegn abolida l'imposiziun da taglia sin la valur da l'atgna locaziun.

Debatta en il parlament	→	16
Arguments dal Cussegl federal e dal parlament	→	18
Text da votaziun	→	20

## Situaziun da partenza

Proprietad d'abitar en Svizra

Valur da l'atgna locaziun

Deducziuns fiscales

Aut indebitament ipotecar

En Svizra vivan surtut locatarias e locataris. Mo var 36 pertschient da las immobiglias abitadas permanentamain vegnan utilisadas da lur proprietarias e proprietaris sezs. En la cumparegliaziun europeica è quai ina fitg pitschna cumpart.<sup>1</sup>

Tgi che posseda ina immobiglia e fa sez diever da tala (possessuras e possessurs d'ina atgna chasa u abitaziun), sto pajar oz a la Confederaziun, als chantuns ed a las vischnancas ina taglia sin las entradas per l'uschenumnada valur da l'atgna locaziun. Quai vala per emprimas e per segundas abitaziuns. Tar las segundas abitaziuns tutgan en spezial las abitaziuns da vacanzas. La valur da l'atgna locaziun s'orientescha en quest connex a l'import che pudess vegnir incassà, sche l'immobiglia vegniss dada en locaziun; per emprimas abitaziuns è ella dentant sut il tschains da locaziun dal martgà.

Da l'autra vart pon ins far valair ina retscha da deducziuns en la declaraziun da taglia, particularmain ils custs per il mantegniment da l'immobiglia ed ils tschains da debits. Quai èn ils tschains ipotecars, ma er auters tschains che n'han da far nagut cun la proprietad d'abitar (p.ex. per credits da consum per locatarias e locataris). Tgi che posseda in'atgna chasa u abitaziun, profitescha dal sistem actual, sche las deducziuns fiscales èn pli autas che la valur da l'atgna locaziun.

Il fatg ch'ils tschains da debits pon vegnir deducids en la declaraziun da taglia, è per las chasadas privatas ina motivaziun da far gronds debits durant in lung temp. L'onn 2023 importava l'indebitament ipotecar quasi 1000 milliardas francs.<sup>2</sup> En relaziun cun il product interieur brut è l'indebitament ipotecar en Svizra fitg aut en la cumparegliaziun internaziunala.<sup>3</sup>

1 Enquista da structura da l'Uffizi federal da statistica (2023) ([bfs.admin.ch](http://bfs.admin.ch) > Statistiken > Bau- und Wohnungswesen > Wohnungen > Wohnverhältnisse > Mieter / Eigentümer) ed Uffizi federal d'abitaziuns ([bwo.admin.ch](http://bwo.admin.ch) > Wohnungsmarkt > Wohneigentum)

2 Forderungen und Verpflichtungen des Sektors private Haushalte und POoE, Banca nazionala svizra ([data.snb.ch](http://data.snb.ch) > Themen > Volkswirtschaft der Schweiz > Daten > Finanzierungsrechnung)

3 Mortgage finance across OECD countries (2021), illustraziun 9, p. 19 ([oecd.org](http://oecd.org) > Publications)

**La refurma**

Aboliziun da la valur da l'atgna locaziun

La Lescha federala davart la midada dal sistem d'imposizion da taglia sin la proprietad d'abitar<sup>4</sup> prevesa da betg pli suuttametter la valur da l'atgna locaziun a la taglia. Da l'autra vart vegnan restrenschidas las deducziuns fiscales. Uschia duai vegnir abolida la deducziun dals custs per il mantegniment da l'immobiglia sin plaun federal, chantunal e communal. Tar la taglia federala directa crodan plinavant davent las deducziuns per mesiras per spargnar energia e per proteger l'ambient.

Nova regulaziun dals tschains da debits

Suenter la midada da lescha pon ils tschains da debits mo pli vegnir deducids, sch'insatgi dispona d'immobilias dadas en locaziun u a fittanza; ultra da quai è la deducziun limitada a la cumpart da la valur da questas immobilias en relaziun cun l'entira facultad. In'excepziun vala per persunas che cumpran per l'emprima giada proprietad d'abitar en Svizra e che dovrان questa proprietad sco emprima abitaziun u chasa: Ellas profiteschan da nov d'ina uschenumnada deducziun dals tschains da debits per l'emprim acquist. Durant 10 onns pon ellas far valair ina deducziun limitada.

Taglia speziala sin abitaziuns secundaras

La nova disposiziun constituziunala permetta als chantuns d'introducir ina taglia speziala sin abitaziuns secundaras che servan per gronda part a l'agen diever. Uschia pon en spezial quels chantuns turistics ch'en pertutgads pli fitg, compensar eventualas perditas d'entradas tar las abitaziuns secundaras. La disposiziun constituziunala dat als chantuns blera libertad per la concepziun concreta e tegna perquai quint da lur differentas situaziuns. Ultra da quai pon ils chantuns autorisar las visch-nancas d'incassar questa taglia. La taglia immobiliara speziala pudess vegnir incassada separadamain u sco supplement ad ina taglia immobiliara existenta.

### Tge sa mida cun la reforma?

La preschentazion mussa, tge che vala oz u è previs en l'avegnir (✓) e tge betg (✗).

	Dretg vertent		Reforma	
	Confede-raziun	Chantuns e vischnancas	Confede-raziun	Chantuns e vischnancas
Imposiziun da taglia sin la valur da l'atgna locaziun	✓		✗	
Deducziun dals custs per il mantegniment da l'immobiglia	✓		✗	
Deducziun dals tschains da debits generals	✓		mo en cas d'immobilias dadas en locaziun u a fittanza	
Deducziun dals tschains da debits per l'emprim acquist	en il rom da la deducziun dals tschains da debits generals		✓	
Deducziun per lavurs da la tgira da monuments	✓	✓ *	✓	✓ *
Deducziun per mesiras per spargnar energia e per proteger l'ambient	✓	✓ *	✗	✓ **
Deducziun dals custs da renatralisaziun en vista ad in nov edifizi compensatoric	✓	✓ *	✗	✓ *
Pussaivladad da transferir deducziuns ***	✓	✓ *	✗	✓ *
Taglia immobiliara speziala sin abitaziuns secundaras	✗	✗	✗	✓ *

\* tut tenor il dretg chantunal

\*\* tut tenor il dretg chantunal e maximalmain fin l'onn 2050

\*\*\* mo deducziuns per spargnar energia, per proteger l'ambient e per renatralisaziuns (limità sin las duas periodas fiscales suandantas)

## Consequenzas da la refurma

Per possessuras e possessurs d'ina atgna chasa u abitaziun

La refurma concludida dal parlament ha consequenzas multifaras per ils pajataglias, per las finanzas federalas, chantunalas e communalas sco er per l'economia publica.

Directamain pertutga la refurma cunzunt persunas che possedan in'atgna chasa u abitaziun e che fan sezzas diever da tala. Las consequenzas fiscales dependan da numerus facturs: dal lieu da domicil, da l'autezza da la valur da l'atgna locaziun, da l'autezza da las deducziuns, da las ulteriuras entradas suttamessas a la taglia sco er d'in eventual incassament da la taglia immobiliara speziala sin abitaziuns secundaras. Ina influenza decisiva ha er il nivel dals tschains ipotecars. Sch'ils tschains èn bass, chaschuna la refurma ina reducziun da taglia per la maioridad da las possessuras e dals possessurs d'ina atgna chasa u abitaziun. Sch'ils tschains ipotecars èn percuter auts, augmenta la refurma las taglias per la maioritat, perquai ch'i n'è per il solit betg pli puissaivel da deducir ils tschains da debits pli auts.<sup>5</sup>

Per ulteriuras persunas

Perquai ch'il dretg vertent permetta da deducir tut ils geners da tschains da debits, per exemplu er tschains per credits da consum u per emprests privats, èn tut ils pajataglias pertulgads da la refurma, pia er las locatarias ed ils locataris. En l'avenir na pon ellas ed els per regla betg pli deducir tschains da debits. En general èn las locatarias ed ils locataris però pertulgads bler main da la limitaziun da la deducziun dals tschains da debits che possessuras e possessurs d'ina atgna chasa u abitaziun, cunquai che passa 90 pertschient da tut las obligaziuns da credit da las chasadas privatas èn ipotecas.<sup>6</sup> La refurma pertutga er locaturas e locaturs privats, perquai che la deducziun dals tschains da debits dependa da nov da la cumposizion da la facultad totala, uschia ch'ellas ed els pon per regla deducir damain tschains da debits che oz. Er tar la taglia federala directa na pon ellas ed els betg pli far valair las deducziuns per mesiras per spargnar energia e per proteger l'ambient.

5 Effects da repartiziun d'ina refurma da l'imposiziun da taglia sin la valur da l'atgna locaziun: consequenzas dal conclus dal parlament dals 20 da december 2024, notizia da l'Administraziun federala da taglia dals 29 d'avrigl 2025 ([<img alt="link icon" style="vertical-align: middle; height: 1em; width: 1em;"/> estv.admin.ch](http://estv.admin.ch) > Die ESTV > Steuerpolitik > Steuerpolitische Gutachten, Berichte, Arbeitspapiere)

6 Facultad da las chasadas privatas en Svizra: concepts e svilup en la cumparegliazion internaziunala, Banca naziunala svizra, chapitel 2 ([<img alt="link icon" style="vertical-align: middle; height: 1em; width: 1em;"/> data.snb.ch](http://data.snb.ch) > Themen > Volkswirtschaft der Schweiz > Publikationen)

Per la Confederaziun, ils chantuns e las vischnancas

Las consequenzas finanzialas da la refurma per il maun public dependan fermamain dal nivel futur dals tschains ipotecars. Sch'il nivel dals tschains è bass, pudess l'aboliziun da l'imposiziun da taglia sin la valur da l'atgna locaziun chaschunar perditas d'entradas en l'autezza da milliardas per la Confederaziun, ils chantuns e las vischnancas; en cas ch'il nivel dals tschains è aut, pudess resultar in surpli d'entradas en l'autezza da milliardas. Tar il nivel actual dals tschains ipotecars<sup>7</sup> vegnan las perditas d'entradas stimadas a totalmain circa 1,8 milliardas francs. Da questa summa pertutgan approximativamain 260 milliuns francs las abitaziuns secundaras. A partir d'in nivel mesaun dals tschains ipotecars da var 3 pertschient pon ins percuter far quint cun entradas supplementaras per l'entir maun public. Las stimaziuns èn colliadas cun intschertezzas, perquai che tscherts elements da la refurma na pon, per mancanza da datas, betg vegnir stimads.<sup>8</sup> Las entradas potenzialas da la taglia immobigliara speziala sin abitaziuns secundaras na sa laschan betg stimar. Lur autezza dependa da la dumonda, sche e co ch'ils chantuns realiseschan questa taglia. Tge effects che la refurma ha a pli lunga vista sin las entradas da l'entir maun public, dependa er da la dumonda, co che las chasadas privatas reageschan sin la nova situaziun fiscala.


<sup>7</sup> A la fin da redaczion da questas explicaziuns dal Cussegl federal importava il nivel dals tschains ipotecars var 1,5 pertschient. Svilup dal tschains da referencia e da la tariffa media ([<img alt="link icon" style="vertical-align: middle; height: 1em; width: 1em;"/> bwo.admin.ch > Mietrecht > Referenzzinssatz > Entwicklung Referenzzinssatz und Durchschnittszinssatz\)](http://bwo.admin.ch)

<sup>8</sup> Stimaziun actualisada da l'Administraziun federala da taglia davart ils effects da la Lescha federala davart la midada dal sistem d'imposiziun da taglia sin la proprietad d'abitar sin las entradas (realizaziun da l'iniziativa parlamentara 17.400) ([<img alt="link icon" style="vertical-align: middle; height: 1em; width: 1em;"/> estv.admin.ch > Die ESTV > Steuerpolitik > Steuerpolitische Dossiers > Wohneigen-tumsbesteuerung > Aktualisierte Schätzung der ESTV\)](http://estv.admin.ch)

### Consequenzas dal nivel dals tschains ipotecars per las entradas fiscales

La stimaziun cumpiglia la midada da lescha; las entradas che resultan tras la midada constituziunala (introducziun da la taglia immobiliara speziala) n'èn betg quantifitgables

miu. francs



█ taglia federala directa      █ taglias chantunalas e communalas

Exempel: En cas d'in nivel mesaun dals tschains (tschains ipotecar da referencia) dad 1,5 % vegnan las perditas d'entradas da la Confederaziun, dals chantuns e da las vischnancas stimadas a circa 1,8 milliardas francs. En cas d'in nivel dals tschains da 4 % vegnan las entradas supplementaras per l'entir maun public stimadas a circa 1,6 milliardas francs.

Funtauna: Administraziun federala da taglia (AFT) – guardar er l'annotaziun sut la marginala «Per la Confederaziun, ils chantuns e las vischnancas»

---

Per l'economia da construcziun

La reforma ha er consequenzas per l'economia publica. Avant l'entrada en vigor pudess l'economia da construcziun survegnir dapli incumbensas, sche possessuras e possessurs d'ina atgna chasa u abitaziun vulessan anc ina giada profitar da la pussaivladad da deducir ils custs da mantegniment en la decleraziun da taglia. Suenter l'entrada en vigor èsi perquai da far quint cun perditas d'incumbensas, en spezial per mesiras che augmentan il confort (p.ex. damain renovaziuns da cuschinias e da bogns). Percunter dastgassan las possessuras ed ils possessurs d'ina atgna chasa u abitaziun avair vinavant in interess da mantegnair la valur da lur chasa u abitaziun. Pervia da quai dastgan ins quintar er a lunga vista cun investiziuns en la substanza da las atgnas chasas ed abitaziuns.

Per il sistem finanzial

Tar ils instituts da finanzas pudess la valurisaziun en il sectur da las fatschentas ipotecaras e da l'administraziun da facultad sa reducir, sche las possessuras ed ils possessurs d'ina atgna chasa u abitaziun dovrان lur meds liquids per diminuir debits existents. Plinavant pudessan las chasadas privatas pajar lur debits pli svelt che cun il sistem actual. Uschia pudessan las chasadas privatas e las bancas daventar pli resistentas a crisas e la stabilitad finanziala pudess vegnir rinforzada a lunga vista.

## Debatta

## Parlament

Il parlament ha discutà intensivamain, tar tge immobiliarias che la valur da l'atgna locaziun duai vegnir abolida. Il parlament è sa decidì d'includer er las abitaziuns secundaras ed ha perquai tschertgà ina pussaivladad, co ch'ils chantuns e las visch-nancas pertutgadas pon cumpensar eventualas perditas d'entradas tar las abitaziuns secundaras. El ha concludì ina midada constituziunala e possibilitescha pia als chantuns d'introducir ina taglia immobiliara speziala sin abitaziuns secundaras.

### Punct dispitaivel «abitaziuns secundaras»

Oriundemain vuleva il Cussegli dals chantuns abolir l'imposiziun da taglia sin la valur da l'atgna locaziun unicamain per las emprimas abitaziuns e mantegnair ella per las abitaziuns secundaras. Il Cussegli naziunal è però s'exprimì per in'abolizun cumplettà ed ha la finala gudagnà.

### Nova disposiziun constituziunala

Sche la valur da l'atgna locaziun d'abitaziuns secundaras n'è betg pli puttamesta a la taglia, po quai chaschunar perditas d'entradas en cas d'in bass nivel dals tschains ipotecars, quai en spezial en tipics chantuns turistics sco il Grischun, il Vallais ed il Tessin. Pervia da quai ha il parlament vulì stgaffir ina pussaivladad da cumpensazion. El ha decidì da permetter als chantuns d'incassar ina taglia immobiliara speziala sin abitaziuns secundaras che servan per gronda part a l'agen diever. Per la realisaizun lascha questa soluzion ina gronda libertad d'agir als chantuns.

### Concepziun pli severa da la deducziun dals tschains da debits

Er areguard la concepziun da la regulaziun futura dals tschains da debits n'èn las duas chombras ditg betg stadas perina. La finala è il parlament sa decidì per la proposta pli severa. Tenor quella pon tschains da debits mo pli vegnir deducids, sch'il pajataglia dispona d'immobiliarias ch'el ha dà en locaziun u a fittanza e sch'il sto pajar taglia sin las entradas da questa locaziun u fittanza. Ultra da quai pon persunas che cumpran per l'emprima giada proprietad d'abitar en Svizra e che dovràn questa proprietad sco emprima abitaziun u chasa, deducir lur tschains da debits. Uschia duai l'access a proprietad d'abitar vegnir facilità en spezial a persunas giuvnas ed a famiglias. La deducziun è dentant pussaivla mo durant in temp limità da 10 onns.

## Minoritads

Ina minoritad dal parlament ha fatg valair differents motivs cunter la refurma. Ina part da la minoritad ha refusà la refurma, perquai ch'ella chaschuna – en cas d'in bass nivel dals tschains – perditas d'entradas per l'entir maun public e va en emprima lingia a favor da las possessuras e dals possessurs d'ina atgna chasa u abitaziun, q.v.d. da bundant in terz da la populaziun svizra. In'autra part ha votà cunter la refurma pervia da l'aboliziun da la valur da l'atgna locaziun sin abitaziuns secundaras. Cunzunt represchentantas e represchentants dals chantuns turistics han dubità, che las perditas finanzialas che resultan tras il project da lescha possian vegnir cumpensadas tras las novas entradas potenzialas da la taglia immobiglia speziala sin abitaziuns secundaras.

 [parlament.ch > RM > Chavazzins, fatschentas, ... > 22.454](#)



## Arguments

# Cussegl federal e parlament

L'imposiziun da taglia sin la valur da l'atgna locaziun fatschenta gia daditg la politica federala. Emprovas anteriuras d'abolir la valur da l'atgna locaziun èn stadas unilateralas ed han fatg naufragi. Questa giada ha il parlament elavurà ina refurma consequenta ed equilibrada da l'imposiziun da taglia sin la proprietad d'abitar. Grazia a l'introducziun da la taglia immobiliara speziala pon chantuns cun bleras abitaziuns secundaras generar, en cas da basegn, novas entradas fiscales. Il Cussegl federal ed il parlament sustegnan il project da lescha ed il project constituziunal particularmain per ils sustants motivs:

### Refurma equilibrada

Las anteriuras emprovas da refurmar l'imposiziun da taglia sin la proprietad d'abitar han fatg naufragi, perquai ch'ellas vulevan bain abolir l'imposiziun da taglia sin la valur da l'atgna locaziun, ma tuttina permetter numerusas deducziuns da taglia. La refurma actuala dal parlament è equilibrada: Ella restrenscha las deducziuns tar la taglia federala directa ad in minimum e limitescha pia er las perditas d'entradas per l'entir maun public. A partir d'in nivel mesaun dals tschains ipotecars da var 3 pertschient pertass la refurma schizunt entradas supplementaras.

### Damain motivaziuns per indebitaments

Tras l'aboliziun da l'imposiziun da taglia sin la valur da l'atgna locaziun vegn er la deducziun dals tschains da debits restrenschida fermemain. La motivaziun da las possessuras e dals possessurs d'ina atgna chasa u abitaziun da far gronds debits durant in lung temp, daventa uschia pli pitschna. Perquai po la refurma gidar a diminuir l'indebitament privat ed uschia promover a lunga vista la stabilitad dal sistem finanzial.

### Distgorgia per personas pensiunadas

Il sistem vertent engrevgescha en spezial possessuras e possessurs d'ina atgna chasa u abitaziun, che han pajà enavos la gronda part da lur ipoteca e che na pon perquai strusch far valair tschains da debits. Tipicamain è quai il cas tar personas pensiunadas. Ellas vegnan distgargiadas tras la refurma.

---

## **Simplificaziun per pajataglias ed administraziun**

L'imposiziun da taglia sin la valur da l'atgna locaziun è complexa e chaschuna perquai er blera lavur. La refurma simplifitgescha il sistem. Tranter auter crodan davent stimaziuns per fixar la valur da l'atgna locaziun. Per ils pajataglias vegn la lavur reducida, perquai ch'els ston inoltrar main quittanzas – per las administraziuns da taglia sa reducescha la lavur, perquai ch'ellas ston far main controllas.

## **Cumpensaziun finanziala necessaria**

La pussaivladad d'incassar ina taglia immobigliara speziala sin abitaziuns secundaras che servan per gronda part a l'agen diever, è impurtanta. Qua tras obtegnan chantuns e vischnancas cun bleras abitaziuns secundaras la libertad necessaria per cumpensar, en cas da basegn, eventualas perditas d'entradas d'abitaziuns secundaras.

## **Soluziuns sin mesira**

La taglia immobigliara speziala pussibilitescha als chantuns ed a las vischnancas pertutgadas da chattar soluziuns individualas. Questa libertad d'agir correspunda al federalism fiscal cumprovà en Svizra.

## **Recumandaziun dal Cussegli federal e dal parlament**

Per tut quests motivs recumondan il Cussegli federal ed il parlament d'acceptar il Conclus federal davart las taglias immobiliarias chantunalas sin abitaziuns secundaras.

# Gea

 [admin.ch/taglias-immobiliarias](http://admin.ch/taglias-immobiliarias)

# §

# Text da votaziun

**Conclus federal  
davart las taglias immobiliarias chantunalas  
sin abitaziuns secundaras**

**dals 20 da decembre 2024**

*L'Assamblea federala da la Confederaziun svizra,*

suenter avair gi invista dal rapport da la Cumissiun per economia e taxas dal Cussegl naziunal dals 25 da zercladur 2024<sup>1</sup>  
e da la posizion dal Cussegl federal dals 21 d'avust 2024<sup>2</sup>,  
*concluda:*

I

La Constituziun federala<sup>3</sup> vegn midada sco suonda:

*Art. 127 al. 2bis*

<sup>2bis</sup> En cas da taglias immobiliarias sin abitaziuns secundaras che servan per gronda part a l'agen diever pon ils chantuns – en il rom da la legislaziun federala – divergiar dals princips tenor l'alinea 2, sche la valur da locaziun da las abitaziuns secundaras che servan a l'agen diever n'è betg suttamessa ad ina taglia federala u chantunala.

II

<sup>1</sup> Quest conclus vegn suttamess a la votaziun dal pievel e dals chantuns.

<sup>2</sup> Il Cussegl federal fixescha l'entrada en vigur.

<sup>1</sup> BBI 2024 1773

<sup>2</sup> BBI 2024 2101

<sup>3</sup> SR 101



**En detagi****Lescha federala davart  
la cumprova electronica  
da l'identitad ed auters meds  
da cumprova electronics  
(Lescha e-ID)**

Arguments dal comité da referendum →	28
Arguments dal Cussegl federal e dal parlament →	30
Text da votaziun →	32

---

## Situaziun da partenza

Tgi che sa move en l'internet, sto eventualmain s'identifitgar. Perquai è naschida già avant intgins onns l'idea d'ina cumprova electronica da l'identitat, ina uschenumnada e-ID. En ina votaziun dal pievel han las votantas ed ils votants dentant refusà ils 7 da mars 2021 l'introducziun d'ina tala e-ID. Las adversarias ed ils adversaris avevan critigà en spezial, che purschidras privatas emettian la e-ID.

## Il stadi scoemittent

Cun la nova lescha è la responsabladad per la e-ID chausa da la Confederaziun: Ella emetta la e-ID e gestiunescha l'infrastructura tecnica necessaria. Las datas che la Confederaziun elavura tar l'emissiun, arcuna ella en ses centers da calculaziun en Svizra. Quai reducescha il privel d'abus. La e-ID vegn arcunada sin il smartphone en ina bursa electronica, in'uschenumnada app wallet. La Confederaziun metta a disposiziun ina tala. Ella sa numna swiyu<sup>1</sup> e n'ha naginas barrieras – ella è pia simpla d'applitgar per tuts. Igl è er pussaivel d'emetter la e-ID en tschertas autras apps.

## Ina infrastructura per tuts

Er autras autoritads ed interpresas pon trair a niz l'infrastructura da la e-ID ed emetter uschia agens meds da cumprova electronics. Exempels per quai èn il permiss da manischar electronic, diploms da scolaziun, attests da commembranza d'uniuns u cartas da clientella. Imaginabel è er, ch'ins po utilissar en l'avegnir la e-ID per liquidar sin via electronica proceduras ch'ins fa fin ussa analogamain sin palpìri, sco per exempli, sch'ins s'annunzia per in'abitaziun da locaziun.

<sup>1</sup> En ils App Stores è la swiyu disponibla gratuitamain. Già oz èsi pussaivel da retrair cun l'app ina e-ID fictiva per intets da test ([eid.admin.ch](https://eid.admin.ch) > Public Beta).

### Per tge po la e-ID veginr utilisada

Utilisaziuns previsas ed utilisaziuns futuras pussaivlas

	Quai poss jau liquidar sin via digitala cun la e-ID	Quests auters attests e documents ma pon star a disposiziun en l'app e-ID (swiyu)
Previsiblemain pussaivel a partir da l'introducziun	<ul style="list-style-type: none"> <li>– avrir in conto da banca</li> <li>– concluder in contract da telefonin</li> <li>– duvurar il login administrativ en tut la Svizra</li> <li>– empustar in extract dal register penal</li> <li>– fundar ina interpresa</li> <li>– furnir la cumprova da vegliadetgna</li> <li>– m'inscriver en il register da las donaziuns d'organs e da tessids</li> <li>– retrair signatures electronicas</li> <li>– e.u.v.</li> </ul>	<ul style="list-style-type: none"> <li>– permiss da manischar</li> <li>– permiss per emprender a manischar</li> <li>– e.u.v.</li> </ul>
Utilisaziuns futuras pussaivlas	<ul style="list-style-type: none"> <li>– empustar in extract dal register da scussiun</li> <li>– suittascriver iniziativas dal pievel e referendums sin via electronica</li> <li>– e.u.v.</li> </ul>	<ul style="list-style-type: none"> <li>– attests da commembranza e cartas da clientella</li> <li>– bigliets da concert</li> <li>– carta da la cassa da malsauns</li> <li>– certificat da provediment</li> <li>– conferma da domicil</li> <li>– diploms ed attestats</li> <li>– document dal vehichel</li> <li>– e.u.v.</li> </ul>

### Protecziun da las datas e da l'identidad

Per prevegnir ad abus d'identitad vegin la e-ID colliada cun il smartphone, uschia ch'i n'è betg pussaivel da copiar la e-ID.<sup>2</sup> Tgi che perda u mida ses smartphone, sto dumandar ina nova e-ID. Tgi che ha ina e-ID e vul utilisar ella, vesa ordavant en l'app swiyu, sch'ina autoritat u ina interpresa è fidable. La Confederaziun controllescha regularmain la segirezza dal sistem. Per quest intent consultescha ella expertas ed experts externs. La Lescha e-ID na prescriva nagina tecnologia concreta. Correspondentamain po la Confederaziun adattar cuntinuadament l'infrastructura e la e-ID als standards da segirezza ed a las tecnologias las pli novas.


2 La colliaziun vegin fatga cun agid d'uschenumnads criptoprocessurs che administreschan il material da codazion en smartphones moderns.

## Communicaziun minimala da datas

Las autoritads e las interpresas dastgan consultar ed arcunar mo quellas datas, ch'èn propi necessarias per l'utilisaziun respectiva. Las persunas che utiliseschan medis da cumprova electronics han la controlla, a tgi ch'els communityeschan tge datas. Per comprar products ch'èn permess pir a partir d'ina tscherta vegliadetgna, dovrà per exemplu ina cumprova da la vegliadetgna. Quai vul dir: i vegn mo communityà, che la persuna respectiva haja la vegliadetgna minimala necessaria. Per autoritads ed interpresas n'èsi en quest cas betg pussaivel da trair conclusiuns a la persuna.<sup>3</sup>

### Utilisaziun da la e-ID

Co circuleschan las datas



<sup>3</sup> Cun preschentiar la e-ID na vegnan transmessas naginas infirmaziuns, sco indicaturs precis, che permettan da colliar tecnicamain singulas utilisaziuns. La Confederaziun sco gestiunaria na sa mai, tgi che ha preschentà ina e-ID.

**L'utilisaziun  
è facultativa  
e gratuita**

Tut las abitantas ed ils abitants da la Svizra sco er tut las Svizras ed ils Svizzers a l'exterior pon dumandar ina e-ID. I na dat dentant nagina obligaziun d'utilisar la e-ID. La Confederaziun furnescha vinavant tut ils servetschs er en furma analoga. Sch'ins vuless declarar l'utilisaziun da la e-ID en l'avegnir sco obligatorica en tscherts cas, fissi necessari d'adattar la lescha. Quai vegniss decidì dal parlament e cunter sia decisiun pudessi lura vegnir fatg in referendum. La e-ID fa part dal service public e n'ha nagina finamira da rendita. Ella po vegnir dumandada gratuitamain en l'internet. Al spurtegl, per exemplu a l'Uffizi da passaports, pon ils chantuns incassar ina taxa per l'identificaziun da persunas. Questa identificaziun è necessaria per survegnir la e-ID. L'utilisaziun da la e-ID è gratuita.

**Elavurà  
cuminaivlaman**

La Confederaziun ha sviluppà la e-ID en il dialog cun persunas interessadas da la scienza, da la sociedad civila e da l'economia. La finamira cuminaivla è adina stada quella da chattar ina soluziun che ha ina basa democratica e ch'è facultativa, segira e simpla d'utilisar per tuts. Regularmain ha la Confederaziun rapportà davart il stadi da las lavurs ed integrà resuns da la populaziun, da la scienza e da l'economia. En in process cuminaivel han las parts participadas tschertgà las meigras soluziuns tecnicas e verifitgà l'applicaziun da talas en la pratica. Uschia per exemplu en il rom dal project da pilot «Permiss per emprender a manischar electronic» en il chantun Appenzell Dadora. Ils custs per sviluppar e per gestiunar la e-ID e l'infrastructura per ils onns 2023 fin 2028 importan circa 180 milliuns francs. Sche las votantas ed ils votants acceptan il project, po la e-ID vegnir introducida il pli baud mez 2026.



## Arguments

# Comités da referendum

### Comité «Lescha-e-ID-NA»

#### Passaport svizzer digital malsegir

La nova Lescha e-ID repeta sbagls da l'onn 2021, cura che la populaziun svizra ha refusà in passaport svizzer digital (e-ID) malsegir, en emprima lingia perquai ch'ella aveva dubis en connex cun la protecziun da datas. Er la nova lescha na porscha naginas garanzias da segirezza suffientas.

**Protecziun da datas insuffizienta:** En l'internet ed en il mintgadi duai la e-ID vegnir duvrada sco cumprova da l'atgna identitad. Cuntrari als documents d'identitad da fin ussa vegniss quai arcunà mintga giada che la e-ID vegn preschentada ad ina interpresa privata. Qua tras resultan grondas quantitads da datas sensiblas ed in potenzial d'abus correspudent. La suletta protecziun da datas efficazia fiss quella da desister da registrar datas betg necessarias.

**Mintga e-ID cuntegna indicaturs precis che permettan da suandar il comportament da las burgaisas e dals burgais:** Quai violescha la sfera privata da la populaziun e cuntegna ristgas sco manipulaziun, discriminaziun e surveglianza, per exemplu tras firmas e concerns gronds da tecnologia. La lescha actuala n'excluda betg questa pussaivladad da persecuziun.

**En la lescha manca ina clera garanzia, che la e-ID resta en mintga cas facultativa:** Custo supplementars u autres malempernaivladads pon metter sut squitsch la populaziun d'utilisar la e-ID. Tenor las votaziuns chantunalas dal pievel vulan passa 90 pertschient da la populaziun il dretg d'avair ina vita offline. Quai vul dir: in access senza discriminaziuns ad alternativas analogas per servetschs statals e privats, senza in sforz d'utilisar tecnologias digitalas.

**En auters pajais vegn l'infrastructura da la e-ID duvrada per sistems da credits socials:** Quests sistems valiteschan la populaziun tenor in sistem da puncts ed èn da princip ina cuntradicziun a la democrazia. Il pli enconuschten cas è la China. Per che la populaziun haja en l'avegnir la fidanza en ina e-ID, stuess la gestiun da sistems da credits socials vegnir scumandada tras lescha.

---

## Comité «Respectar la voluntad dal pievel – MASS-VOLL!»

**L'onn 2021 ha il  
pievel refusà la  
e-ID cun 64,4 %!**

Adina dapli surveglianza, sforz a la digitalitat e controlla – cun in cler na a la e-ID ha il pievel blocçà questa via. La e-ID na resta mai facultativa, mabain maina ad ina surveglianza collectiva totala. Cumbinà cun daners digitals da la banca centrala daventa il burgais pli e pli transparent. Ils dretgs politics pudess ins exequir mo pli cun ina e-ID. Ils concerns gronds profitan da las datas persunalas. Ina protecziun da datas segira è nunpuissaivla. Persunas senza smartphone u affinitat tecnica vegnan discriminadas; il dretg d'avair ina vita analoga svanescha. En crisas serva la e-ID sco basa per mesiras repressivas che destrueschan la democrazia ed ils dretgs fundamentals. Mo in na protegia l'urden constituziunal da la Svizra.

 [massvoll.swiss/e-id](http://massvoll.swiss/e-id)

**Cooperà al referendum ha er la Partida dals pirats.**

 [piratenpartei.ch/eid](http://piratenpartei.ch/eid)

**Recumandaziun  
dals comités da  
referendum**

Perquai recumondan ils comités da referendum:

# Na

## Arguments

# Cussegl federal e parlament

Cun la e-ID statala èsi pussaivel da cumprovar en l'internet l'atgna identitad. A medem temp permetta la e-ID ina protecziun optimala da la sfera privata. Tgi che utilisescha ina e-ID, po liquidar fatschentas cun autoritads ed interpresas en l'internet en moda segira, agreabla, effizienta ed en blers cas pli simpla. Da quai profita l'entira populaziun. Il Cussegl federal ed il parlament sustegnan il project per ils sustants motivs:

### La Svizra dovrà ina e-ID

Per tschertas purschidas en l'internet ston las utilisadoras ed ils utilisaders cumprovar lur identitad. Actualmain fan las autoritads e las interpresas la controlla en differentas modas, per exemplu cun pretender ina fotocopia da la carta d'identitad per concluder in abunament per in telefon mobil u per avrir in conto da banca. Quai è cumplitgà e malsegir. Gia blers stadis mettan a disposiziun ina e-ID a lur burgaisas e burgais e porschan uschia blers servetschs en moda nuncumplitgada. Per che la Svizra possia gidar a concepir la transfurmazion digitala er sin plaun internaziunal, dovri ina e-ID.

### La e-ID porta transparenza

Grazia a la e-ID san las utilisadoras ed ils utilisaders exact, a tgi che lur datas vegnan communitygadas. La Confederaziun furnescha las infurmaziuns correspontentas. Ella sviluppescha ed emetta la e-ID e gestiunescha l'infrastructura necessaria.

### La e-ID protegia la sfera privata

La e-ID garantescha ina protecziun optimala da la sfera privata. Tgi che dovrà la e-ID, decida cun mintga utilisaziun sez, per tge che la e-ID vegn duvrada ed a tgi che tge datas vegnan transmessas. Las autoritads e las interpresas dastgan consultar ed arcunar mo quellas datas, ch'èn necessarias per la fatschenta respectiva. Per exemplu na dastga ina interpresa che vende products ch'èn permess pir a partir d'ina tscherta vegliadetgna, betg dumandar la schlattaina. Plinavant po la cumprova da la vegliadetgna vegnir furnida senza transmetter la data da naschientscha exacta. Las persunas che utiliseschan la e-ID reveleschan pia damain infurmaziuns che quai ch'ellas tradissan cun preschentare la carta d'identitad.

---

## La e-ID rinforza la plazza economica

Grazia a la e-ID pon persunas privatas, interpresas ed autoritads lavurar tras e tras en moda electronica. Quai spargna custs che resultan en process analogs. La e-ID promova l'innovaziun e la cumpetitivitat da la Svizra sco plazza economica.

## La e-ID rinforza la suveranitat digitala

Cun l'augment da l'impurtanza da l'internet crescha er il basegn d'avair in med electronic segir per cumprovar l'identidad. Sche la Lescha e-ID vegn refusada, pudessan sa far valair medis da cumprova electronics privats, per exemplu da gronds concerns internaziunals da tecnologia. Per talas purschidas na pudess la Confederaziun betg surpigliar la responsabladad per la proteczion da la sfera privata e per la segirezza da las datas. Quai restrenschess la suveranitat digitala da la Svizra.

## Recumandaziun dal Cussegl federal e dal parlament

Per tut quests motivs recumondan il Cussegl federal ed il parlament d'acceptar la Lescha e-ID.

# Gea

 [admin.ch/lescha-e-id](http://admin.ch/lescha-e-id)

**§**

# Text da votaziun

## Lescha federala

davart la cumprova electronica da l'identitad ed auters meds  
da cumprova electronics  
(Lescha e-ID, LFEID)

dals 20 da december 2024

*L'Assamblea federala da la Confederaziun svizra,*

sa basond sin ils artitgels 38 alinea 1, 81 e 121 alinea 1 da la Constituziun federala<sup>1</sup>,  
suenter avair gi invista da la missiva dal Cussegl federal dals 22 da november 2023<sup>2</sup>,  
*concluda:*

## 1. secziun: Object ed intent

### Art. 1

<sup>1</sup> Questa lescha regla:

- a. l'infrastructura messa a disposizion da la Confederaziun per emetter, per revocar, per verifitgar, per conservar e per preschentiar meds da cumprova electronics (infrastructura da confidenza);
- b. las rollas e las responsabladads en connex cun metter a disposizion e cun utilisar questa infrastructura;
- c. la cumprova electronica da l'identitad da las personas naturalas emessa da la Confederaziun (e-ID) ed auters meds da cumprova electronics.

<sup>2</sup> Ella ha l'intent da garantir, che:

- a. las mesiras tecnicas ed organizatoricas che vegnan prendidas per emetter e per utilisar meds da cumprova electronics, correspundian al tip ed a la dimensiun da l'elavurazion da datas e sajan adattadas per limitar la ristga respectiva per la personalitat e per ils dretgs fundamentals da las personas pertutgadas, particularmain cun realisar ils sustants princips:
  1. la protecziun da las datas tras tecnica e configuraziuns preseleczioniadas,
  2. la segirezza da las datas,
  3. la minimaziun da las datas,
  4. l'arcunaziun decentrala da las datas,
  5. la transparenza e la reutilisazion da las datas,
  6. la controlla statala permanenta da l'infrastructura da confidenza e dal sistem d'infurmazion per emetter e per revocar la e-ID;

<sup>1</sup> SR 101

<sup>2</sup> BBI 2023 2842

# §

- b. ils meds da cumprova electronics possian vegnir emess ed utilisads en moda segira da las persunas privatas e da las autoritads;
- c. la e-ID e l'infrastructura da confidenza correspundian al stadi actual da la tecnica ed a las pretensiuns d'access da las persunas cun impediments;
- d. il svilup tecnic en connex cun ils meds da cumprova electronics na vegnia betg restrenschi inutilmain.

## 2. secziun: Infrastructura da confidenza

### Art. 2 Register da basa

<sup>1</sup> L'Uffizi federal d'informatica e da telecommunicaziun (UFIT) metta a disposizion in register da basa public; quel cuntegna datas ch'èn necessarias per:

- a. verifitgar, sch'ils meds da cumprova electronics, sco clavs criptograficas ed identificaturs, èn vegnids midads posteriuramain;
- b. verifitgar, sch'ils meds da cumprova electronics derivan da las emittentas ch'èn inscrittas en il register da basa e dals identificaturs respectivs;
- c. inscriver en il register da basa las persunas, che emettan meds da cumprova electronics (emittentas) u che verifitgeschan tals (verifitgadras);
- d. verifitgar, sch'in med da cumprova electronic è vegni revocà.

<sup>2</sup> Las emittentas e las verifitgadras pon inscriver lur datas en il register da basa.

<sup>3</sup> Il register da basa na cuntegna naginas datas davart ils singuls meds da cumprova electronics, cun excepcziun da las datas che pertutgan lur revocaziun.

<sup>4</sup> Las datas che pertutgan la revocaziun d'in med da cumprova electronic na dastgan betg permetter da deducir l'identidad da la titulara u dal titular ubain il cuntegn dal med da cumprova.

<sup>5</sup> Las datas personalas che vegnan generadas cun consultar il register da basa, dastgan vegnir:

- a. registradas tenor l'artitgel 57<sup>l</sup> litera b cifras 1–3 da la Lescha dals 21 da mars 1997<sup>3</sup> davart l'organisaziun da la regenza e da l'administraziun (LORA); il Cussegl federal regla il termin da conservaziun;
- b. analisadas tenor l'artitgel 57<sup>l</sup> litera b cifras 1–3 LORA senza sa referir a persunas;
- c. analisadas tenor l'artitgel 57<sup>n</sup> litera a LORA cun sa referir a persunas, dentant senza num;
- d. analisadas tenor l'artitgel 57<sup>o</sup> alinea 1 literas a e b LORA cun sa referir a persunas e num.

## §

### Art. 3 Register da confidenza

<sup>1</sup> Il UFIT metta a disposizion in register da confidenza public; quel cuntegna datas ch'èn utilas per:

- a. verifitgar las identitads inditgadas da las emittentas e da las verifitgadras;
- b. utilisar en moda segira ils meds da cumprova electronics.

<sup>2</sup> El è responsabel per la correctedad da las infurmaziuns ch'èn cuntegnidas en il register da confidenza.

<sup>3</sup> Sin dumonda d'ina autoritat federala, chantunala u communalala conferma el cun agid dal register da confidenza, ch'in identificatur ch'è inscrit en il register da basa appartegna a questa autoritat.

<sup>4</sup> Sin dumonda d'ina emittenta u d'ina verifitgadra privata conferma el, che l'identificatur appartegna ad ella.

<sup>5</sup> El inscriva las confermas dals identificaturs en il register da confidenza.

<sup>6</sup> Las datas persunalas che vegnan generadas cun consultar il register da confidenza, dastgan vegnir registradas ed analisadas tenor l'artitgel 2 alinea 5.

<sup>7</sup> Il Cussegli federal regla la preparaziun d'autras infurmaziuns che garanteschan l'utilisaziun segira dals meds da cumprova electronics; latiers tutgan spezialmain las datas davart la moda e maniera, co ch'ils meds da cumprova electronics vegnan utilisads, e las datas che permettan da constatar, tgi ch'è autorisà d'mitter e da verifitgar in tschert tip da meds da cumprova electronics.

### Art. 4 Sistem per augmentar la protecziun da la sfera privata

La Confederaziun po gestiunar sistems che protegian la sfera privata da la titulara u dal titular, cura ch'ella u el preschenta in med da cumprova electronic.

### Art. 5 Emissiun

<sup>1</sup> Tgi che vul emetter meds da cumprova electronics, po utilisar per quest intent l'infrastructura da confidenza.

<sup>2</sup> Ultra dal cuntegno che l'emittenta ha determinà, ston ils meds da cumprova electronics cuntegnair las datas ch'èn necessarias per verifitgar l'autenticidad e l'integritad, sco ina signatura electronica.

### Art. 6 Revocaziun

Las emittentas pon revocar ils meds da cumprova electronics ch'ellas han emess.

### Art. 7 Furma e conservaziun dals meds da cumprova electronics

<sup>1</sup> La titulara u il titular survegn ses med da cumprova electronic en furma d'in pachet da datas.

<sup>2</sup> Ella u el po tscherner libramain ils meds tecnics per conservar quel.



**Art. 8** Applicaziun per conservar e per preschentar ils medis da cumprova electronics

<sup>1</sup> Il UFIT metta a disposiziun in' applicaziun che permetta a la titulara u al titular da retschaiwer, da conservar e da preschentar medis da cumprova electronics sco er da far copias da segirezza da tals.

<sup>2</sup> Il Cussegl federal po prevair, ch'il UFIT metta a disposiziun in sistem, nua che las titularas ed ils titulars pon deponer las copias da segirezza da lur medis da cumprova electronics fatgas en l'applicaziun tenor l'alinea 1. Il UFIT procura, che las copias sajan protegidas cunter l'access da terzs.

<sup>3</sup> Il Cussegl federal fixescha las mesiras che ston vegnir prendidas en cas d'ina inactivitatd pli lunga en il sistem, en spezial sche las copias da segirezza na vegnan betg actualisadas u na vegnan betg utilisadas da las titularas e dals titulars.

<sup>4</sup> Las datas che vegnan generadas en l'applicaziun tenor l'alinea 1, cura ch'ils medis da cumprova electronics vegnan preschentads e verifitgads, dastgan vegnir arcunadas mo cun il consentiment explicit da la titulara u dal titular.

**Art. 9** Applicaziun per verifitgar ils medis da cumprova electronics

<sup>1</sup> Il UFIT metta a disposiziun in' applicaziun che permetta da verifitgar la valaivladad da la e-ID.

<sup>2</sup> Il Cussegl federal po prevair, che questa applicaziun permetta da verifitgar er la valaivladad d'auters medis da cumprova electronics.

**Art. 10** Preschentazion dals medis da cumprova electronics

<sup>1</sup> Cura che la titulara u il titular preschenta in med da cumprova electronic, sto ella u el pudair decider, tge elements da quel e tge infurmaziuns deduciblas da quel che vegnan transmess a la verifitgadra.

<sup>2</sup> In med da cumprova electronic vegn preschentà e verifitgà, senza che l'emittenta haja enconuschentscha da quai.

<sup>3</sup> En il rom da la gestiun dal register da basa, dal register da confidenza e dals sistems per augmentar la protecziun da la sfera privata na survegn il UFIT betg enconuschentscha dal cuntegn dals medis da cumprova electronics preschentads e na po betg deducir l'utilisaziun dals medis da cumprova e las autoritads e las personas privatas participadas, danor sin basa da las datas generadas durant las consultaziuns da quests registers.

**Art. 11** Obligaziun d'annunziar cyberattatgas

Las emittentas e las verifitgadras annunzian a l'Uffizi federal da la cybersegirezza mintga cyberattatga sin lur sistems.

**Art. 12** Code da funtauna da l'infrastructura da confidenza

<sup>1</sup> Il UFIT revelescha il code da funtauna da la software da l'infrastructura da confidenza.

## §

<sup>2</sup> El na revelescha betg il code da funtauna ed er betg parts da tal, uschè ditg ch'ils dretgs da terzs u motivs relevantes per la segirezza excludan u restrenchan quai.

<sup>3</sup> El edescha directivas per la revelaziun coordinada da puncts debels.

<sup>4</sup> El verifitgescha regularmain la segirezza da l'infrastructura da confidenza cun terzs qualifitgads.

### 3. secziun: E-ID

#### Art. 13 Furma

L'Uffizi federal da polizia (fedpol) emetta la e-ID en furma d'in med da cumprova electronic, a maun da l'infrastructura da confidenza.

#### Art. 14 Premissas persunalas

Las premissas persunalas per survegnir ina e-ID ademplescha tgi che, il mument da l'emissiun da la e-ID:

- a. posseda in dals sustants documents:
  1. in document d'identitat valaivel tenor la Lescha federala dals 22 da zercladur 2001<sup>4</sup> davart ils documents d'identitat (LDI),
  2. in document da legitimaziun da personas estras valaivel tenor la legislaziun federala davart las personas estras, l'integrazion e l'asil,
  3. ina carta da legitimaziun valaivla tenor la legislaziun davart il stadi ospitant;
- b. ha dumandà in document tenor la litera a ed ademplescha las premissas per l'emissiun da quest document.

#### Art. 15 Cuntegn

<sup>1</sup> La e-ID cuntegna las suandardas datas davart la persuna:

- a. num uffizial;
- b. prenum(s);
- c. data da naschientscha;
- d. schlattaina;
- e. lieu d'origin;
- f. lieu da naschientscha;
- g. naziunalidad;
- h. fotografia da la fatscha;
- i. numer AVS.

## §

<sup>2</sup> Ultra da quai cuntegna ella las suandardas datas:

- a. numer da la e-ID;
- b. data d'emissiun;
- c. data da scadenza;
- d. indicaziuns davart il document d'identitat ch'è vegnì utilisà durant la procedura d'emissiun, en spezial il tip e la data da scadenza dal document d'identitat;
- e. indicaziuns davart la procedura d'emissiun.

<sup>3</sup> Ella po cuntegnair ulteriuras indicaziuns, particularmain il num da la represchentanza legala, il num d'allianza, il num obtegni en in urden religius, il num d'artist u il num da partenadi e la menziun da segns particulars, sche talas indicaziuns figureschan en il document d'identitat ch'è vegnì utilisà durant la procedura d'emissiun.

### Art. 16 Dumonda

<sup>1</sup> La persuna che vul ina e-ID, sto far ina dumonda al fedpol.

<sup>2</sup> Igl è pussaivel da dumandar a medem temp pliras e-ID.

<sup>3</sup> Persunas minorenzas e persunas sut curatella cumplessiva ston agiuntar a la dumonda la decleraziun da consentimenter da la represchentanza legala.

### Art. 17 Verificaziun da l'identitat

<sup>1</sup> La persuna, per la quala vegn dumandada la e-ID , sto laschar verifitgar sia identitat:

- a. online tras il fedpol; u
- b. personalmain tar in dals posts u da las autoritads en Svizra ch'ils chantuns han designà, u tar in dals posts u da las autoritads a l'exterior ch'il Cussegli federal ha designà.

<sup>2</sup> Per verifitgar l'identitat vegn la fatscha da la persuna cumparegliada cun la fotografia ch'è arcunada:

- a. en il sistem d'infurmaziun per documents d'identitat (ISA) tenor l'artitgel 11 LDI<sup>5</sup>;
- b. en il Sistem d'infurmaziun central davart la migraziun (SIMIC) tenor l'artitgel 1 da la Lescha federala dals 20 da zercladur 2003<sup>6</sup> davart il sistem d'infurmaziun per il sectur da las persunas estras e da l'asil;
- c. en il sistem d'infurmaziun Ordipro tenor l'artitgel 1 da la Lescha federala dals 18 da december 2020<sup>7</sup> davart l'elavuraziun da datas personales tras il Departament federal d'affars exterius.

<sup>5</sup> SR 143.1

<sup>6</sup> SR 142.51

<sup>7</sup> SR 235.2

## §

<sup>3</sup> La cumparegliaziun da la fatscha da la persuna cun la fotografia tenor l'alinea 2 po vegnir fatga en moda automatisada.

<sup>4</sup> Per verifitgar l'identitat online po il fedpol relevan datas biometricas per far la cumparegliaziun tenor l'alinea 2.

### Art. 18 Emissiun

<sup>1</sup> Il fedpol emetta la e-ID, sche:

- a. las premissas tenor l'artitgel 14 èn ademplidas; e
- b. l'identitat da la persuna, per la quala vegn dumandada la e-ID, ha pudiè vegnir verifitgada.

<sup>2</sup> Cun emetter la e-ID stabilescha el ina connexiun tranter la e-ID e sia titulara u ses titular.

<sup>3</sup> La e-ID vegn emessa en l'applicaziun per conservar e per preschentiar ils meds da cumprova electronics tenor l'artitgel 8 alinea 1.

<sup>4</sup> La persuna petenta po dumandar d'emetter la e-ID en in'autra applicaziun, sch'igl è pussaivel durant l'emissiun da verifitgar tecnicamain la connexiun cun sia titulara u ses titular.

<sup>5</sup> Il Cussegl federal po permetter d'emetter la e-ID en ulteriuras applicaziuns. Questas applicaziuns ston esser renconuschidas dal Departament federal da giustia e polizia. La renconuschientscha vegn concedida, sche:

- a. la connexiun cun la titulara u il titular è garantida tras mesiras tecnicas ed organizatoricas adequatas; e
- b. l'applicaziun è certifitgada tenor l'artitgel 13 da la Lescha federala dals 25 da settember 2020<sup>8</sup> davart la protecziun da datas u porscha garanzias equivalentas per la protecziun da las datas.

<sup>6</sup> Il Cussegl federal precisescha las pretensiuns envers las applicaziuns tenor ils alineas 4 e 5.

### Art. 19 Revocaziun

Il fedpol revochescha immediatamain la e-ID:

- a. sche la titulara u il titular pretenda quai;
- b. sche – en cas da persunas minorenas u da persunas sut curatella cumplessiva – la represchentanza legala pretenda quai;
- c. sch'igl exista in suspect motivà d'ina utilisaziun abusiva u d'ina obtenziun fraudulenta da la e-ID;
- d. sch'el vegn infurmà, che:
  1. il document d'identitat utilisà per la procedura d'emissiun è vegni retratg, u

## §

2. la titulara u il titular è mort;
- e. sch'i vegn emessa ina nova e-ID per la medema persuna;
- f. sche la segirezza da la e-ID na po betg vegnir garantida.

### **Art. 20** Procedura

En connex cun la e-ID regla il Cussegli federal las suandantas proceduras:

- a. l'inoltraziun da dumondas d'emissiun;
- b. la verificaziun da l'identitat;
- c. l'emissiun;
- d. la revocaziun.

### **Art. 21** Durada da valaivladad

La valaivladad d'ina e-ID è limitada. Il Cussegli federal regla la durada da valaivladad.

### **Art. 22** Obligaziuns da diligenza da la titulara u dal titular

<sup>1</sup> La titulara u il titular d'ina e-ID prenda las mesiras necessarias e raschunaivlas per impedir in'utilisaziun abusiva da tala.

<sup>2</sup> Sch'i vegn supponida in'utilisaziun abusiva da la e-ID, annunzia ella u el quai immediatamain ed en mintga cas al fedpol.

### **Art. 23** Obligaziun da diligenza da las verifitgadras

<sup>1</sup> Las verifitgadras pon pretender la transmissiun da las datas persunalas cuntegnidas en la e-ID, sche:

- a. la legislaziun prevesa la verificaziun da l'identitat u d'in aspect parzial da l'identitat da la titulara u dal titular; u
- b. quai è indispensabel per la fidadidad da la transacziun, particularmain per impedir abus u l'enguladitsch d'ina identitat.

<sup>2</sup> Sche las premissas tenor l'alinea 1 vegnan violadas, inscriva il UFIT quai en il register da confidenza, uschia che la titulara u il titular vesa l'inscripziun a chaschun d'ina transacziun, ed el po excluder las verifitgadras dal register da confidenza.

### **Art. 24** Obligaziun d'acceptar la e-ID

Tut las autoritads e tut ils auters posts che adempleschan incumbensas publicas ston acceptar la e-ID, sch'els fan ina identificaziun cun exequir il dretg federal.

### **Art. 25** Alternativa a la preschentaziun d'ina e-ID

Tgi che accepta la e-ID u parts da quella sco med da cumprova, sto er acceptar in document d'identitat tenor l'artitgel 14, sche la titulara u il titular cumpara persunalmain.

## §

### **Art. 26** Sistem d'infurmazion per emetter e per revocar la e-ID

<sup>1</sup> Il fedpol gestiunescha in sistem d'infurmazion per emetter e per revocar la e-ID.

<sup>2</sup> Il sistem d'infurmazion cuntegna:

- a. las datas tenor l'artitgel 15 alinea 2 davart las e-ID dumandadas ed emessas;
- b. las datas davart la procedura d'emissiun, ch'èn necessarias per intets da support e da statistica sco er per retschertgas en connex cun l'obtenziun fraudulenta u l'utilisazion abusiva d'ina e-ID;
- c. las indicaziuns davart la revocaziun da la e-ID.

<sup>3</sup> Il sistem d'infurmazion acceda a las datas tenor l'artitgel 15 alinea 1 sur ina interfatscha cun ils suandants sistems d'infurmazion:

- a. ISA;
- b. SIMIC;
- c. il register electronic dal stadi civil tenor l'artitgel 39 dal Cudesch civil svizzer<sup>9</sup>;
- d. il register central da las persunas assicuradas tenor l'artitgel 49d da la Lescha federala dals 20 da december 1946<sup>10</sup> davart l'assicuranza per vegls e survivents;
- e. Ordipro.

<sup>4</sup> Las datas consultadas dastgan vegnir utilisadas mo per emetter e per revocar ina e-ID. Ellas na vegnan betg arcunadas en il sistem d'infurmazion.

<sup>5</sup> Il fedpol edescha directivas per la revelaziun coordinada da puncts debels e verifitgescha regularmain la segirezza dal sistem d'infurmazion cun terzs qualifitgads.

<sup>6</sup> El revelescha il code da funtauna da la software dal sistem d'infurmazion.

<sup>7</sup> El na revelescha betg il code da funtauna ed er betg parts da tal, uschè ditg ch'ils dretgs da terzs u motivs relevants per la segirezza excludan u restrenschan quai.

### **Art. 27** Conservaziun e destrucziun da las datas

<sup>1</sup> Las suandantas datas cuntegnidas en il sistem d'infurmazion vegnan destruidas suenter la scadenza dals termins inditgads qua sutvart:

- a. las datas concernent las e-ID dumandadas ed emessas sco er las indicaziuns davart lur revocaziun: 20 onns suenter la data da la dumonda u da l'emissiun da la e-ID;
- b. las datas concernent la procedura d'emissiun, inclusiv las datas biometricas tenor l'artitgel 17 alinea 4, ch'èn necessarias per retschertgas en connex cun l'obtenziun fraudulenta d'ina e-ID e che vegnan conservadas mo per quest intent: 5 onns suenter la scadenza da la e-ID.

<sup>9</sup> SR 210

<sup>10</sup> SR 831.10

## §

<sup>2</sup> Tut las autres datas vegnan destruidas 90 dis suenter ch'ellas èn vegnidias registradas en il sistem.

<sup>3</sup> Resalvadas èn las disposiziuns federalas davart l'archivaziun.

## 4. secziun: Accessibladad per persunas cun impediments

### Art. 28

<sup>1</sup> Il fedpol procura, che la procedura per retrair la e-ID saja accessibla per persunas cun impediments.

<sup>2</sup> Il UFIT procura, che las applicaziuns tenor ils artitgels 8 e 9 sajan accessiblas per persunas cun impediments.

<sup>3</sup> Las autoritads che utiliseschan l'infrastructura da confidenza per emetter e per verifitar meds da cumprova electronics, procuran che lur proceduras per retrair e per utilisar tals meds da cumprova sajan accessiblas per persunas cun impediments.

<sup>4</sup> Il Cussegl federal fixescha mesiras per garantir l'access per persunas cun impediments.

## 5. secziun: Support

### Art. 29

Il fedpol ed il UFIT porschan a las utilisadoras ed als utilisaders in servetsch da support tecnic per emetter las e-ID e per utilisar l'infrastructura da confidenza.

## 6. secziun: Svilup tecnic

### Art. 30

<sup>1</sup> Il Cussegl federal po complettar l'infrastructura da confidenza ed il sistem d'infurmaziun per emetter e per revocar las e-ID cun elements supplementars, sch'il svilup tecnic pretenda quai per cuntanscher las finamirias da questa lescha.

<sup>2</sup> En cas ch'i vegnan elavuradas datas personalas spezialmain sensiblas u en cas ch'i dovrà per auters motivs ina regulazion sin il stgalim da la lescha, scadan las disposiziuns tenor l'alinea 1, sche:

- a. il Cussegl federal n'ha betg suttamess fin 2 onns suenter l'entrada en vigur a l'Assamblea federala in sboz d'ina basa legala;
- b. l'Assamblea federala refusa il sboz dal Cussegl federal; u
- c. la basa legala entra en vigur.

**§****7. secziun: Taxas****Art. 31**

<sup>1</sup> Il UFIT incassescha taxas da las emittentas e da las verifitgadras per las datas ch'ellas inscrivan en il register da basa, e per las datas ch'ellas dumondan d'inscriver en il register da confidenza.

<sup>2</sup> Las autoritads communalas e chantunalas na pajan náginas taxas.

<sup>3</sup> La persuna, per la quala vegn dumandada la e-ID, na paja náginas taxas per l'emissiun e per la revocaziún da la e-ID.

<sup>4</sup> Ils chantuns pon prevair, ch'il post cumpetent incassescha taxas per ils servetschs furnids al lieu.

<sup>5</sup> Il Cussegl federal regla las taxas en il rom da l'artitgel 46a LORA<sup>11</sup>.

**8. secziun: Contracts internaziunals****Art. 32**

<sup>1</sup> Il Cussegl federal po concluder en moda autonoma contracts internaziunals per facilitar l'utilisaziun e la renconuschientscha giuridica da la e-ID svizra a l'exterior sco er la renconuschientscha da las e-ID estras en Svizra.

<sup>2</sup> El decretescha las disposiziuns ch'en necessarias per exequir ils contracts internaziunals concerrent objects tenor l'alinea 1.

**9. secziun: Disposiziuns finalas****Art. 33** Disposiziuns executivas

Il Cussegl federal decretescha disposiziuns executivas, en spezial davart:

- a. il format dals meds da cumprova electronics;
- b. ils standards ed ils protocols per las proceduras da communitgar datas, particularmain en il rom da l'emissiun e da la preschentaziun dals meds da cumprova electronics;
- c. ils elements ed il funcziunament dal register da basa, dal register da confidenza, da l'applicaziun per conservar e per preschenttar ils meds da cumprova electronics sco er da l'applicaziun per verifitgar ils meds da cumprova electronics;
- d. ils mussaments che ston vegnir preschentads per l'inscripziun en il register da confidenza;

<sup>11</sup> SR 172.010

---

**§**

- e. las mesiras tecnicas ed organizatoricas che garanteschan la protecziun e la segrezza da las datas durant che l'infrastructura da confidenza vegg messa a disposiziun, gestiunada ed utilisada;
- f. ils elements, las interfatschas ed il funcziunament dal sistem d'infurmazion per emetter e per revocar las e-ID.

**Art. 34** Midada d'auters decrets

La midada d'auters decrets vegg reglada en l'agiunta.

**Art. 35** Disposiziun transitorica

<sup>1</sup> L'obligaziun d'acceptar la e-ID (art. 24) sto vegin ademplida il pli tard 2 onns suenter l'entrada en vigur da la disposiziun respectiva.

<sup>2</sup> Il Cussegl federal po prevair, che l'infrastructura da confidenza e la e-ID veggan messas a disposizion en etappas, entaifer maximalmain 2 onns suenter l'entrada en vigur da questa lescha, quai pertutga particularmain:

- a. la preparaziun dal register da confidenza per emittentas u verifitgadras privatas tenor l'artitgel 3 alinea 4;
- b. la funczionalitat da l'applicaziun tenor l'artitgel 8;
- c. il dumber dad e-ID emessas online;
- d. la verificaziun da l'identidad tenor l'artitgel 17 alinea 1 litera b.

**Art. 36** Referendum ed entrada en vigur

<sup>1</sup> Questa lescha è suttamessa al referendum facultativ.

<sup>2</sup> Il Cussegl federal fixescha l'entrada en vigur.

# §

*Agiunta*  
(art. 34)

## Midada d'auters decrets

Las leschas federalas qua sutvart vegnan midadas sco suonda:

### 1. Midada dals 29 da settember 2023<sup>12</sup> da la Lescha federala dals 18 da decembre 2020<sup>13</sup> davart la segirezza da las infurmaziuns

*Art. 74b al. 1 lit. v*

<sup>1</sup> L'obligazion d'annunzia vala per:

- v. emittentas e verifitgadras da meds da cumprova electronics en il senn da la Lescha e-ID dals 20 da decembre 2024<sup>14</sup>.

### 2. Lescha federala dals 20 da zercladur 2003<sup>15</sup> davart il sistem d'infurmaziun per il sectur da las persunas estras e da l'asil

*Art. 9 al. 1 lit. c cifra 7<sup>bis</sup> e 2 lit. c cifra 3*

<sup>1</sup> Tras ina procedura d'invista po il SEM render accessiblas las datas dal sectur d'esters ch'el ha elavurà u ch'èn vegnidas elavuradas per sia incumbensa en il sistem d'infurmaziun, e quai a las suandardas autoritads u als suandardants posts:

- c. a las autoritads federalas en il sectur da la segirezza interna, exclusivamain per identifitgar persunas en cas:

<sup>7bis</sup>. da l'adempliment da lur incumbensas tenor la Lescha e-ID dals 20 da decembre 2024<sup>16</sup>,

<sup>2</sup> Tras ina procedura d'invista po il SEM render accessiblas las datas dal sectur d'asil ch'el ha elavurà u ch'èn vegnidas elavuradas per sia incumbensa en il sistem d'infurmaziun, e quai a las suandardas autoritads u als suandardants posts:

- c. a las autoritads federalas en il sectur da la segirezza interna;
- 3. per ademplir lur incumbensas tenor la Lescha e-ID;

<sup>12</sup> AS 2024 257

<sup>13</sup> SR 128

<sup>14</sup> SR ...

<sup>15</sup> SR 142.51

<sup>16</sup> SR ...

## §

### 3. Lescha dals 22 da zercladur 2001<sup>17</sup> davart ils documents d'identitat

*Art. 1 al. 3 segunda frasa*

<sup>3</sup> ... Questas persunas pon er esser burgais esters.

*Art. 11 al. 2 segunda frasa*

<sup>2</sup> ... Plinavant serva ella ad ademplir las incumbensas tenor la Lescha e-ID dals 20 da december 2024<sup>18</sup>.

### 4. Cudesch civil svizzer<sup>19</sup>

*Art. 43a al. 4 cifra 9*

<sup>4</sup> A las datas ch'èn necessarias per controllar l'identitat d'ina persuna han – en la procedura d'invista – access:

9. il post federal ch'è cumpetent per emetter la e-ID, per ademplir sias incumbensas tenor la Lescha e-ID dals 20 da december 2024<sup>20</sup>.

### 5. Lescha federala dals 11 d'avrigl 1889<sup>21</sup> davart la scussiun ed il concurs

*Art. 33a al. 2bis*

<sup>2bis</sup> Sche l'inaltraziun vegn fatga sin via electronica sur ina plattaforma da la Confederaziun, basti da preschentiar ina e-ID tenor la Lescha e-ID dals 20 da december 2024<sup>22</sup> empè d'ina signature electronica qualifitgada. Il Cussegli federal designescha las plattaformas che pon vegnir utilisadas per quest intent.

<sup>17</sup> SR 143.1

<sup>18</sup> SR ...

<sup>19</sup> SR 210

<sup>20</sup> SR ...

<sup>21</sup> SR 281.1

<sup>22</sup> SR ...

## §

### **6. Lescha federala dals 19 da zercladur 2015<sup>23</sup> davart il dossier electronic dal pazient**

*Art. 7* Med d'identificaziun electronic

<sup>1</sup> Las suandardas persunas ston posseder in med d'identificaziun electronic segir per avair l'access al dossier electronic dal pazient:

- a. las pazientas ed ils pazients;
- b. las persunas spezialisadas dal sectur da sanadad.

<sup>2</sup> Il Cussegl federal definescha las pretensiuns per ils meds d'identificaziun e fixescha la procedura per lur emissiun.

*Art. 11 lit. c*

L'obligaziun dad esser certifitgà d'in post renconuschi vala per:

- c. ils editurs privats da meds d'identificaziun.

### **7. Lescha federala dals 18 da mars 2016<sup>24</sup> davart la signatura electronica**

*Art. 9 al. 4 e 4<sup>bis</sup>*

<sup>4</sup> Il Cussegl federal designescha ils documents che la persuna petenta po duvrar per cumprovar sia identitat ed eventuais attributs.

<sup>4bis</sup> Sch'ina persuna preschenta ina e-ID tenor la Lescha e-ID dals 20 da decembre 2024<sup>25</sup> sco med per cumprovar sia identitat, na sto ella betg cumparair persunalmain. Il Cussegl federal po prevair, che er las persunas che cumprovan lur identitat en in'autra moda, cun la fidabilidad necessaria, èn exceptadas da cumparair persunalmain.

### **8. Lescha federala dals 17 da mars 2023<sup>26</sup> davart l'utilisaziun da meds electronics per ademplir las incumbensas da las autoritads**

*Art. 11 al. 3<sup>bis</sup>*

<sup>3bis</sup> Sco med d'informatica en il senn dals alineas 1–3 gestiunescha la Chanzlia federala in sistem che permetta d'autentifitgar persunas naturalas sin basa da la e-ID tenor la Lescha e-ID dals 20 da decembre 2024<sup>27</sup>.

<sup>23</sup> SR **816.1**

<sup>24</sup> SR **943.03**

<sup>25</sup> SR ...

<sup>26</sup> SR **172.019**

<sup>27</sup> SR ...



---

# Gea

Il Cussegl federal ed il parlament recumondan  
da votar ils 28 da settember 2025 sco suonda:

---

# Gea

Conclus federal davart las taglias immobigliaras  
chantunalias sin abitaziuns secundaras

Lescha e-ID



**VoteInfo**

L'app davart las votaziuns  
Cun videos d'explicaziun e resultats

